

奉持品第二十七 十有七章

奉持品者。解說道義法貴德行不用貪侈。

好經道者	不競於利	有利無利
無欲不惑	常愍好學	正心以行
擁懷寶慧	是謂為道	所謂智者
不必辯言	無恐無懼	守善為智
奉持法者	不以多言	雖素少聞
身依法行	守道不忌	可謂奉法
所謂老者	不必年者	形熟髮白
蠢愚而已	謂懷諦法	順調慈仁
明遠清潔	是為長老	所謂端政
非色如花	慳嫉虛飾	言行有違
謂能捨惡	根原已斷	慧而無恚
是謂端政	所謂沙門	非必除髮
妄語貪取	有欲如凡	謂能止惡

恢廓弘道	息心滅意	是為沙門
所謂比丘	非時乞食	邪行姪彼
稱名而已	謂捨罪福	淨修梵行
慧能破惡	是為比丘	所謂仁明
非口不言	用心不淨	外順而已
謂心無為	內行清虛	此彼寂滅
是為仁明	所謂有道	非救一物
普濟天下	無害為道	戒眾不言
我行多誠	得定意者	要由閉損
意解求安	莫習凡人	使結未盡
莫能得脫		